

08/11/1997

Jaminan realisasikan sasaran tanam tiga juta pokok

KUCHING, Jumaat - Pihak berkuasa tempatan di sini berjanji untuk merealisasikan sasaran negara menanam tiga juta pokok baru menjelang tahun 2000.

Datuk Bandar Kuching Selatan, Chan Seng Kai, berkata beliau yakin Sarawak akan dapat mencapai sasaran menanam 70,000 pokok penghujung tahun ini seperti yang ditetapkan oleh kerajaan.

Beliau berkata, Majlis Bandaraya Kuching Selatan (MBKS) setakat ini sudah menanam kira-kira 30,000 pokok pelbagai jenis sejak 1990.

Katanya, kira-kira 1,000 pokok lagi akan ditanam pada Hari Arbor pada 16 November ini.

Isteri Ketua Menteri, Puan Sri Laila Taib, dijangka merasmikan upacara penanaman pokok itu.

Ketua Lanskap dan Perancangan Dewan Bandaraya Kuching Utara (DBKU), Durie Augustine, berkata DBKU telah menanam 21,000 pokok sejak 1990.

Katanya, tahun ini DBKU telah menanam 1,200 pokok dan kini mencapai 20.5 peratus daripada sasaran tahun pertamanya.

Kempen Penanam Pokok Negara yang dikelolakan oleh Kementerian Perumahan dan Kerajaan Tempatan dan pihak berkuasa tempatan dilancarkan Mac tahun ini.

Sasaran yang ditetapkan bagi setiap negeri ialah Perak (90,000 pokok), Johor dan Selangor masing-masing (80,000), Sabah dan Sarawak masing-masing (70,000), Wilayah Persekutuan (65,000), Pulau Pinang dan Kelantan (50,000), Pahang (40,000), Negeri Sembilan (30,000), Melaka (20,000), Perlis (10,000) dan Labuan (5,000).

Menteri Perumahan dan Kerajaan Tempatan, Datuk Dr Ting Chiew Peh, kelmarin, menyatakan rasa tidak puas hati dengan pembabitan beberapa kerajaan negeri dalam kempen menanam pokok yang dilancarkan Perdana Menteri, Datuk Seri Dr Mahathir Mohamad, lapan bulan lalu.

Dr Ting berkata, walaupun sasaran sebanyak 750,000 pokok harus ditanam di seluruh negara dalam setahun sudah ditetapkan, sehingga Oktober hanya 153,000 pokok ditanam.

"Jika ini berterusan, negara tidak mungkin dapat mencapai sasaran tiga juta pokok ditanam menjelang tahun 2000," katanya.

Dr Ting berkata, jumlah yang ditanam mungkin lebih daripada itu, tetapi tidak dapat dinyatakan dengan tepat berikutan ada dua tiga negeri yang tidak membuat penyelarasan dan tidak menghantar laporan.

(END)